


B. N. C
FIRENZE
1069
12

1069.12









RESPONSE

AI

DV

CROCHETEUR DE LA SAMA- RITAINE,

A

JACQUES BON-HOMME PAYSAN
de Beauvoisis, Su. sa lettre écrite à Messieurs
les Princes retirés de la Cour.




À PARIS,
Chez JEAN BRUNET, rue saint Germain,
aux trois Pigeons.

Avec permission.

1614







RESPONSE DV CROCHE-
TEUR DE LA SAMARITAINNE.

~

*Jacques bon-homme Paysan de Beauuoisis, sur sa lettre
escrite à Messieurs les Princes
retirez de la Cour.*



OMPERE Jacques, ie des-
roüillois vn vieux mous-
quet paralytique & estropié
de la moitié de ses mem-
bres, quand ton beaufrere
Thiebaud me rendit ton
pacquet, si proprement plié
en carré, que ie l'eusse pris
pour vn Angelot, s'il en eust eu aussi bien la cou-
leur que la forme. Ie n'eusse iamais creu qu'il
eust esté faict en vn village, si ie n'eusse trouué
en vne des encoignures vn peu de foin, que tu
y auois mis pour remplir le vuide & le mieux
vnir. Ie l'ouuris; il y auoit deux lettres dedans,
l'une que tu m'escriuois, l'autre que tu adres-
sois à Messieurs les Princes icy assemblez, la-
quelle tu me priois de rendre seurement en
main propre. Mot qui m'a sans mentir bien
donné de la peine, & tabuté l'entendement: Car
ie confesseray librement mon ignorance, ie de-

meuray sept demy heures, vn quart, deux minutes & vne once pour percer l'intelligence de ceste parole. Je n'y pouuois mordre; Iusqu'à ce qu'ayant demandé a boire, & la seruante me donnant vn verre, l'hotesse qui prit garde qu'elle auoit encore les mains toutes grasses de la vaisselle qu'elle venoit de lauer, luy dict. Fy, que tu es mal propre de presenter comme cela ce verre à cest honnestesoldat, avec tes mains ordres & vilaines. Laisse cela & va-t'en les lauer tout à cest heute: i'entendis par là ce que tu voulois dire. Cest pourquoy ie ne manquay pas de me trouuer le lendemain sur les onze heures dans la salle en laquelle Messieurs les Princes deuoient disner: Car i'ay assez bonne mine quand ie veux, ouy, & puis ie suis cogneud'un Suisse de la maison, d'un Sommelier, & du plus ancien Palefrenier. La i'atendis la teste nuë qu'ils eussent lauë les mains pour se mettre à table, & lors m'aprochant de Monsieur le Prince, apres luy auoir fait vne reuerence sur le modele des enfans Bleus demandans par l'Eglise, ie luy presentay ta lettre, avec tes humbles recommandations à ses bonnes graces, & luy renouellay suyuant ce que tu me mandois, la memoire des abricots que tu luy presentas il y a quelques annees, vne fois qu'ayant esté surpris en poupoint d'une guillee d'eau en chassant, il se vir garrer soubz le portail de ta vieille grange. Le bon Seigneur se mit à rire & me dit qu'il s'esouuenoit fort bien: que tu auois ton bon bouqueton avec des guesres de toille neufue & vne

grosse gaine à la ceinture garnie de deux couteaux de Chastelleraut. Que tu portois vne grande, espaisse & blanche barbe, avec des cheueux longs mipartis en greue (ie n'entends pas pourquoy il parla plustost sur ce subiect de la Greue que de la place Maubert) à la mode des vieux Gaulois: Que tu estois bel homme, grand, droict & portant la teste aussi haute qu'un nouveau venu à Paris qui cherche chambre garnie. Il adiousta que tu estois de fort bonne compagnie & facetieux: Surquoy il rapporta que t'ayant enquis ie ne sçay sur quel propos en gauffant, si les abricots n'auoient point quelque vertu particuliere, tu luy respondis plaisamment, que la chair estoit souveraine au mal de dents apposee sur la partie affectee, (ie pense que c'est quelque mot nouveau de la Cour) dans la bouche, si mettant par apres la teste dans vn four, on l'y pouuoit tenir sans tousser, iusqu'à ce que le ius fondu par la chaleur humectast les genciues; quant aux noyaux, qu'ils estoient fort salutaires aux goutteux, si se couchants sur vn monceau d'iceux, ils remuoient les pieds & les mains, iusqu'à ce qu'ils fussent tous cassez & reduits en poudre; dequoy tout le monde se mit à rire. Au demeurant, dict-il, homme d'aussi bon sens que i'en aye encore veu. le le iettay en diuers discours à dessein durât trois heures qu'il m'entretint, il me respondit tousiours si pertinemment que ie doutay si ce ne seroit point quelque bon vieillard de ville trauesti pour quelque dessein en villageois. Car il n'en auoit

pour tout rien quel'habit : & ay tousiours creu
 que ce liure qui fut imprimé il y à quatre ou
 cinq ans soubz le nom du Payfan François, ne
 venoit point d'autre main : ce qui monstre qu'il
 n'a pas esté tousiours nourry entre la vache &
 la charruë ; car c'est vn discours remply de
 bons excellents & salutaires aduis pour la
 reformation des abus & desordres de
 l'Estat, & possible que c'est sur ce subiect
 qu'il m'escrit, voyons que c'est. Là dessus il
 commanda à vn de ses Secraitaires d'ouurir sa
 lettre & de la lire tout haut. Ce qu'il fit, avec tel
 plaisir & contentement de toute l'assistâce, qu'il
 y en eut d'eux qui s'oublièrent de boire, & vn
 autre qui au lieu de porter vne aïsse de pigeon à
 la bouche, la porta à l'oreille ; tant il estoit attentif.
 Tout le monde estoit estonné d'ouyr vne si dou-
 ce & si nayfue eloquence. Apres qu'elle eut esté
 audiencée, M^{rsieur} le Prince dit qu'il doutoit si
 tu estois descendu de ce Jacques Bon-hôme là,
 parce qu'il pensoit auoir autrefois ouy dire à feu
 M^{rsieur} le Febure son Precepteur, qu'il auoit
 esté tué avec to^s ses enfans par le nauphin. Tou-
 tesfois qu'il s'en rapportoit. De ce discours, on
 entra dans vn autre, qui fut des miseres & com-
 bustions deplorables de ce temps-là, durant les
 quatre années que ce bon & noble Roy Iean,
 dont ta lettre faiët mention à l'entree, pris par
 son oppiniaistrise à la iournée de Poictiers, de-
 meura prisonnier en Angleterre. Je louë Dieu,
 de ce que si ie n'ay pas si bon esprit, comme plu-
 sieurs autres, pour le moins j'ay fort bonne me-

moire. Car ie rapporterois quasi de mot à mot si ie voulois, tout ce qui fut dit là dessus. Par ma foy, il faict bon ouyr ces Messieurs, ils sçauent de belles & bonnes choses, il netient qu'à eux qu'ils ne les facent. Aga, ce Monsieur le Prince te parloit des choses passees, il y a ie ne sçay cō-bien d'ans, comme s'il les eust leuës dans ton gros liure. Peut estre aussi est-ce luy quil'a composé: car ils disent qu'il entend aussi bien le Latin que Conseiller ou Aduocat de la Cour. Ce qui m'agrea le plus, fut ce qu'il dit de ce Charles Roy de Nauarre, gendre du Roy Iean, contre les troupes duquel le grand pere de ton ayeul comme tu dis, ou ton trisayeul, comme ils disent qu'ils faut dire, s'esleua pour leur faire rendre la plume des poules qu'ils luy auoient mangees. Il l'appella mauuais garçon, broüillon, factieux, ennemy du repos public, & le blasma grandement, de ce que durant la captiuité du Roy son beau-pere, & la ieunesse du Dauphin, il auoit par vn leurre vain de reformation, & de liberté, soubseuë le peuple amateur de nouveauté, & pour pescher en eau trouble, remply l'Estat de confusion: de quoy il disoit qu'il fut à la fin puny, par vne issue lamentable: car il fut bruslé à petit feu dans vn linceul. Chose estrange, Iacques, si elle est vraye: car il me sēble qu'il n'auoit qu'à pisser dedans pour l'esteindre. En fin toutes les paroles qu'il dit là dessus, furent prises par beaucoup de gē pour autāt d'ostages, de paix. En effect, c'est dit-on, vn fort bon Prince, il y a apparence qu'il ne voudra point trou-

bler le repos du Royaume, & qu'il reiettera sagement les conseils turbulents de ceux qui se figneroient de faire de son mescontentement vn passe par tout aux villages pour les branqueter. Il ne faignit pas de le dire, tout haut, protestant qu'il n'éviendroît iamais aux armes si on ne l'y contraignoit. Dequoy vn Gascõ qui estoit derriere, vers la cheminee, cõceut vn tel despit, que trãsporté de colere, il en frappa du pied vn grãd coup contre le plancher. On luy demanda ce que c'estoit: il respõdit que c'estoit vne grosse araignee prestee d'accoucher: & que la crainte qu'il auoit que quelqu'vne de ces meschantes bestioles, ennemies des armes, ne vint tẽdre les toiles sur la cuirasse, faisoit qu'il en tuoit autant qu'il en trouuoit, ayant de tout temps hay cet animal, à cause qu'il ne le prend qu'à plus foible que soy, & encore en trayson, & par supercherie. Mais quelque temps apres estant sorty en la basse-court, il commença d'euaporer sa fougue en plaintes & menaces. Je le rencontray, & à qui en voulez-vous, luy dis-je, mon Capitaine? Ah! dit-il, à ce croquant de ton pays, qui a enuoyé ceste lettre: que mal de terre le vire. Nous auons la guerre sans luy, forcier qu'il est: Car ie veux perdre la teste & les deux balaffres que j'ay au front, en seignes de ma valeur, s'il n'a charmé tous ces Princes de son babil. Cap. de S. Arnaud, qu'elle villainie, qu'vn pied plat cõme cela soit plustost creu que deux mille soldats tous prests au premier commandement de leur chef, d'aller prédre le Bastille, si on les laisse faire. Ne voit on pas

pas qu'il ne parle que pour son interest, de peur
 de perdre quelque poule ou quelque brebis roi-
 gneuse? Par la mort de tous mes ennemis, qui
 pend au bout de mon espee, ie petille, i'enrage,
 ie creue. Mais Diou me damne, le Payfan le
 payera. A peine auoit il acheué ces mots, qu'il
 alla engager ses armes a vn Maquignon pour le
 loiage d'un cheual, resolu tout a faict de t'aller
 tuer, Bon-homme, & de faire vn tambour de ta-
 peau, pour effrayer tous les autres qui oseroient
 donner vn conseil de paix. Je le suiuis, & voyât
 que ie ne le pouuois destourner de ceste opinia-
 stre resolution par raisons ny remonstrances,
 i'eus recours aux ruses. Gautier Garguille, dont
 ie t'ay autresfois parlé, est icy depuis ces festes,
 desguisé en vieillard avec vne longue perruque
 & barbe blâche, & vn habit quasi semblable au
 tien, afin de mieux descouurir sans estre cogneu,
 vn de ses cōpagnons qui luy ayant emporté son
 faye & ses grosses lunettes, s'est venu ietter icy
 dans quelques troupes. Nous auions eu querel-
 le ensemble le soir precedent apres soupper, sur
 le subiect du cheual Bayard: car m'ayant de-
 mandé à combien de poings ie croyois qu'il se
 ferrast, ie luy respondis à treize. Il soustenoit
 qu'il ne se ferroit qu'à quatre, nō pl^s que les au-
 tres. La dessus nous gageasmes cinquante sols
 & demy, & nous en rapportasmes au voisin ma-
 reschal, qui me condamna brauement, disant
 que quand on ferroit vn cheual quel qu'il fust, il
 ne falloit que deux poings pour luy tenir le
 pied, & autres deux pour enfoncer le clou dans

la corne avec le marteau. Le regret de ma perte me fit de bagouler cōtre luy quelque iniures, qui accueilles d'un demētir eussēt esclarté en coups si le mareschal se mettant entre deux n'eust fait le hola. Cela se passa pour lors de la façon. Mais pour me vanger de luy par les mains d'autrui, ie m'aduisay de ceste fourbe. Ie fais accroire au Gascon que s'il me vouloit donner cinquante sols & demy, (qui estoit la somme que j'auoy perdue) ie luy mettroys dans vn quart d'heure le Paylan qu'il cherchoit entre les mains, sans qu'il s'allast escorcher les fesses sur vne melchante selle qui n'auoit que les os & la peau. Il accepte l'offre, ie touche l'argent. Ie luy fais voir de cent pas mon homme qui s'en venoit en tapinois le long de la rue. Il se iette dessus. Iamais courraut ne fut mieux estrillé. Il fut dobé a poids de marc. Et tu conseilles la paix, vilain, & tu dissuades la guerre, marrouffe, ha ha, de par le diable, picque tes bœufs & ne te m'fle d'autre chose. Autant de mots, autant de gourmandes, dans les dents, dans les yeux, au méton, au nés, par tout: Il ne falloit pas qu'il demandast comme au partage du gasteau des Rois, pour qui. Il eust esté ladre verd s'il ne l'eust senty. Ie te laisse à penser si i'estois bien ayse de voir cela, & de diuertir la fure de ce diable baptizé, de ta teste, sur celle de mon ennemy. Cela fait, ie me desrobay gentiment & m'en retournay la ou i'auois laissé nos Princes, qui parloient encore de toy, & se mocquoient vn peu de ta mesure eble d. Ils me dirent par apres qu'il te feroient

responce vn de ces iours, & me commanderent de t'escire cependant qu'ils auoient prisa remonstrance en bonne part, & qu'ils t'en ay-
moient tellement, que si iamais l'occasion s'en
presentoit, ils te feroient du bien: Ils en ont
le moyen, Iacques, & en font tous les iours a
gens qui ne leur donnent pas de si bons conseils
que toy; Ils le recognoistront, ie m'en assure.
Après cela ils se mirent à ioüer au malcontent.
Et moy après leur auoir fait vne reuerence con-
grüe du genoüil & de la teste, ie me retiray
pour t'escire cecy & t'en dire mō opinion, qui
est que ces Princes ne viendrōt iamais à la guer-
re qu'a l'extremité: Ils sont tous François, & ay-
ment trop leur honneur & le repos public pour
entreprendre rien dans l'Estat contre le bien &
le seruice du Roy. Voila le iugement que i'en
fais: Toutesfois ie ne veux respondre de rien.
Car qui respond, paye le plus souuent. Je sçay
qu'il a mal pris a mon pere pour auoir caution-
né comme tu sçais, l'oncle de sa tante Arnette.
Cela le mit si bas qu'il fut vne fois reduict à boi-
re de l'eau, la chose du mōde qu'il a tousiours le
plus haye iusqu'a la mort. De laquelle se voyant
proche il s'en fit apporter vn plein verre, & cō-
me on luy eust demandé, qu'elle humeur le
prenoit, veu le mal qu'il auoit voulu toute sa
vie a ceste liqueur, il respondit, cest la raison
pour laquelle i'en veux boire a cest heure: car
Il faut reconcilier auant mourir avec ses enne-
mis. Je suis bien son fils de ce costé là: Je n'ay-
me point d'autre eau que celle qu'on donne à

lauer les mains pour se mettre à table. Mais tout cela est vn peu hors de propos. Je reuiés à la dernière partie de ta lettre, en laquelle tu m'exhortes de quitter ce courage guerrier & de retourner à Paris. Mon bon compere, ie pense que c'est mon meilleur, & que ie ne tarderay guiere à le faire. Car par ma foy, comme tu dis fort bien, il y faiët plus beau qu'icy. O place Maubert! ô Pont neuf! ô place aux Veaux! ô port au Charbon! ô port au foin! qu'il m'ennuie que ie ne vous reuoie. Mais sur tout ce bon petit cabaret nouueau vers l'Eschelle du Temple, ou i'auois si bien gaigné tés bonnes graces, grosse Nicole, par le moyen de trois sols que ie t'auois donnez en neuf fois, que i'auois rousiours du frais & du meilleur. En bonne foy il y a plus de plaisir là qu'à courre la vache par les champs avec vne harquebuse sur l'espaule, On n'y a pas la moitié du temps son saoul de pain & d'eau. Ah! que le Diable m'emporte si i'y vay. Que Flambon demeure icy s'il veut. Quant à moy ie m'en retourne. Ce fut luy qui m'y traina: Il estoit caualé par trois ou quatre Sergens du Chastelet, & ne sçauoit plus sur quel pied danser. Cela luy fit prendre resolution de se venir ietter en ses quartiers: & par ce qu'il se faschoit d'y venir seul, il me vint embabouïner de belles paroles pour m'induire à luy faire compagnie, me representant que ie deurois mourir de honte de demeurer en vne ville, ou i'auois receu l'affront que chacun sçauoit, d'estre degradé de la place en laquelle on m'auoit constitué sur l'horologe

de la Samaritaine. Que si i'auois tant soit peu d'honneur ou de courage, ie m'en deuois ressentir. Que c'estoit à c'est heure quel'occasion s'en preseroit par le moyen de ceste guerre, durant laquelle si Paris venoit a estre pris, ie pourrois par l'intelligence que i'y ay avec les Crocheteurs mes compagnons, me saisir du Pont neuf, & le garder iusqu'à ce que pour reparation du tort qu'on m'auoit fait, les Escheuins de Paris s'offrissent de me venir remettre eux mesmes en ma place avec ceremonie, & de me donner peage iur tous les Maquereaux, Gredins Coupeurs de bourse, Cocus & gens de semblable estoffe, qui y passeroient. Ce qu'il n'estimoit pas si peu que pourueu qu'il n'y eust point de fraude, & que ie prisse seulement vn sols pour teste où pour corne, ie n'eusse moyen d'acheter dans huit iours vn office de Sergent à Verge, ou de Crieur iuré, comme estoit mon frere en premieres nopces. Il m'en vouloit mesme faire party. Il me prit comme il falloit. Car i'auois eu le soir auparauât querelle contre nostre femme à cause de quelque cotterets que ie voulois chastre, elle ne le vouloit pas; dilant qu'vne de ses voisines l'auoit asseuré qu'autant que i'en chastrois en Careme, autant en donnois ie au diable, pour me chauffer les pieds & à elle, si elle le permettoit, en Purgatoire. Elle s'opiniastra, ie la battis: Cela fit que i'ouuris plus volontiers l'oreille aux inductiōs de ce charlatan. Je m'en repens à c'est heure, car ie ne veux point manger de guerre, où si i'en veux ce sera


par ma foy, pour seruir le Roy. Pourquoy? c'est nostre maistre, nous luy deuons cela. Il est si gentil, si potelé, si esueillé : & puis on dict, qu'il sçait des-ja bien remarquer ce qu'on luy fait. S'il venoit à sçauoir que i'eusse porté les armes contre luy, il me feroit faire la premiere fois qu'il me rencontreroit, vne querelle d'Allemand par quelque Suisse, qui me donneroit de la hante de son halebarde sur les cheuenx en passant, sans qu'il en fust iamais autre chose. Car i'auois beau en informer, au diable le Commissaire ny le Sergent qui voudroit se leuer du liect pour luy aller mettre la main au collet. Il faudroit que ie beusse cela doux comme lait. Ah! que ie n'y vay pas, mon espee est trop courte. Il y a vne autre chose, c'est que i'ayme desmesurément ce petit Prince, ie ne sçay ce qu'il m'a fait. Je ne sçauois iamais estant à Paris, qu'il deust passer en quelque endroit, que ie ne laissasse & coterrets & verres pour y acourir & crier, viue le Roy. La derniere fois que ie le vis, ce fut sur le Pont neuf, à son retour de Fontaine-bleau, sur l'entree de l'hyuer passé. Il estoit vestu d'un long casquin d'Escarlatte, couuert de passement d'or (car il a eu permission du Pape verifiée en toutes les barrières des Sergens de Paris) & un petit chapeau retioussé, il ne me souuient plus de quelle couleur. Deuât & apres luy, marchoient ces Messieurs les Princes qui sont icy, il les faisoit si bon voir que rien plus. Je leur conseillerois, si i'estois de leur Conseil, de s'en tenir tousiours, comme ils estoient lors, le plus pres,

qu'ils pourroient. C'est leur honneur & leur profit. Les fols aux eschets & les sages à la Cour sont tousiours les plus proches du Roy. I'ay apris cela d'un bon compagnon, qui me bailla vne fois vne lanterne de papier rimé à porter à vn petit homme vieux qui sçait plus de secrets qu'Alexis Piemontois, duquel i'ay leu vne fois le liure, pour me faire reuenir le poil du menton qu'une fièvre chaude m'auoit faict tomber. I'auois encor quelque chose à t'escire, mais il ne m'en souuent plus; ce sera pour vne autre fois, quand ie seray à Paris, ou i'espere de m'acheminer demain. Ce soir icy i'iray là où sont Messieurs les Princes, & si ie puis remarquer, ou c'est qu'ils mettent leurs mescontentement, ie les desroberay, & puis haut le pied. Ie le feray par la morbille, & s'il y a chien qui m'abboyne, ie puisse demeurer vn an sans boire, si ie ne luy fourre ma coutelasse quatre aunes entre chair & cuir. I'ay de bons amis, Dieu mercy, qui me feront du soir au matin auoir mon abolition de tout. En tout cas, la fierte de Roüen ne me peut marquer. Car ie cognoy deux honnestes hommes qui ont enuie d'estre Chanoines de la grande Eglise, lesquels en recognoissance de ce que i'ay deux fois porté leurs hardes de leur logis au coche, feront quelque chose pour moy. Bonhomme ie me recommande à tes bonnes graces à celles de tes deux fils, & de tes trois filles mariées. Boy matin & porte toy bien, & tu viuras long temps, Ie suis *Ton tres-affectionné seruisueur, à vendre & à engager Le Crocheteur.*

R 1069

12

99 958213









MC

